

Na osnovu člana 8. i 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09), člana 27. Zakona o privremenom korišćenju javnih površina na području Kantona Sarajevo („Službene novine Kantona Sarajevo“, br. 20/04, 26/12, 32/12 i 24/15) i člana 25. Statuta Općine Stari Grad Sarajevo - Prečišćeni tekst („Službene novine Kantona Sarajevo“, broj 20/13), Općinsko vijeće Općine Stari Grad Sarajevo, na sjednici održanoj dana _____ donijelo je

N A C R T

ODLUKU

O PRIVREMENOM KORIŠTENJU JAVNIH POVRŠINA NA PODRUČJU OPĆINE STARI GRAD SARAJEVO

PRVI DIO - OPĆE ODREDBE

Član 1. (Predmet)

Ovom Odlukom utvrđuju se uslovi i kriteriji za dodjelu lokacija za privremeno korištenje javnih površina za postavljanje kioska, slobodnostojećih otvorenih bašti, slobodnostojećih reklamnih panoa i slobodnostojećih displeja, visina naknade svih vidova privremenog korištenja javnih površina na području Općine Stari Grad Sarajevo (u daljem tekstu: Općina), način naplate i mjere za sigurnu i efikasnu naplatu i druga pitanja od značaja za utvrđivanje naknade za korištenje javnih površina.

Član 2. (Nadležnost)

- (1) Površine u smislu ove Odluke su površine definisane članom 3. Zakona o privremenom korištenju javnih površina ("Službene novine Kantona Sarajevo", br. 20/04, 26/12, 32/12 i 24/15) (u daljem tekstu: Zakon).
- (2) Rješenje kojim se odobrava korištenje javne površine, kao i rješenje o utvrđenoj naknadi u smislu ove Odluke, donosi Općinski načelnik putem nadležne Službe za oblast komunalnih poslova.
- (3) Nakon izdavanja odobrenja za privremeno korištenje javnih površina, nadležna Služba za oblast inspeksijskih poslova će putem komunalnog redara obilježiti javnu površinu u skladu sa lokacijom koja je sastavni dio rješenja.

Član 3.
(Sadržaji - značenje pojmova)

- (1) Sadržaji u smislu ove Odluke, koji se mogu privremeno postaviti na javnim površinama su:
- Kiosk je privremena, tehnološki dovršena, cjelovita i tipizirana prostorna jedinica, lagane konstrukcije koji se može premještati i uklanjati sa lokacije u kornadu. Postavljanje na terenu izvodi se suhom montažom na odgovarajućoj podlozi.
 - Slobodnostojeća otvorena bašta koju čine: stolovi, stolice, zaštite od sunca (suncobran ili tenda), pomična ograda, žardinjere za cvijeće, sistem za rashlađivanje, odnosno grijanje, šank sa pratećom opremom, rashladni uređaj. Nije dozvoljeno postavljanje čvrsto ugrađene opreme bašte, te betoniranje i drugi čvrsti radovi na javnoj površini. Slobodnostojeću ljetnu baštu mogu predstavljati i rekonstruirana prevozna sredstva, posebno prilagođena za obavljanje ugostiteljske djelatnosti.
 - Slobodnostojeći reklamni pano;
 - Slobodnostojeći displej;
 - Slobodnostojeće telefonske govornice;
 - Stolovi ispred ugostiteljskih radnji koji se u pravilu postavljaju u neposrednoj blizini objekta u kojoj se nalazi ugostiteljski poslovni prostor. Na odobrenoj lokaciji postavljenoj ispred ugostiteljskog objekta nije dozvoljeno postavljanje roštilja, ražnja, šank-pulta, fontane, muzičkog uređaja, niti je dozvoljeno izvođenje muzike uživo. Na odobrenoj lokaciji mogu se nalaziti i drugi elementi, kao što su: montažno-demontažni podij, tenda oslonjena na tlo (montažno-demontažnog otvorenog ili zatvorenog tipa), suncobrani, žardinjere za cvijeće, sistem za rashlađivanje, odnosno grijanje, rashladni uređaj, jarboli, korpe za otpatke;
 - Prodajni sto ispred poslovnog prostora za izlaganje i prodaju robe je pokretna, lako prenosiva i prostorno neovisna jedinica na kojoj se vrši izlaganje i prodaja robe;
 - Prodajni sto/tezga je pokretna, lako prenosiva i prostorno neovisna jedinica na kojoj se vrši izrada i prodaja umjetničkih predmeta, te prodaja drugih vrsta usluga (portreti, nakit, slike, umjetničke tvorevine i sl.).
 - Rashladni uređaj je uređaj za izlaganje i prodaju pića, sladoleda i sl. Ispred poslovnog prostora mogu se postaviti najviše dva rashladna uređaja;
 - Žardinjera za cvijeće je betonsko, drveno ili korito od drugog prikladnog materijala, ispunjeno zemljom u kojoj su zasađene dekorativne biljke. Oblik, veličina i upotrijebljeni materijali moraju odgovarati neposrednoj okolini i funkciji žardinjere;
 - Vaga za osobno mjerenje je sprava za mjerenje tjelesne težine i visine;
 - Sanduk za čišćenje obuće je naprava otvorenog tipa;
 - Cirkuski šator je ograđeni prostor za održavanje cirkuskih predstava u svrhu zabave djece i odraslih, sa pratećim sadržajem;
 - Parking za bicikle;

Drugi specifični sadržaji:

- Objekat jednostavnih usluga je prostorno neovisna i prenosiva prostorna jedinica (u pravilu na točkovima), predviđena za obavljanje uslužne i ugostiteljske djelatnosti.
 - Uslužna naprava je automat za izradu fotografija, prodaju sladoleda, cigareta, i sl., peć za pečenje kokica, kestena, kukuruza, palačinki, "hot dog"-a i slične naprave, koja mora biti izrađena od strane ovlaštenog proizvođača, locirana na jednom mjestu.
 - Dječji autići i vozići su naprave za zabavu i razonodu djece.
 - Čuvarska kućica je naprava zatvorenog tipa, jednodimenzionalna, demontažna i prenosiva cjelina, izgrađena od više konstrukcijskih dijelova koji se povezuju bez primjene građevinskih vezova i koji se povezuju na podlogu bez ubetoniranja, ili sličnog trajnog povezivanja. Oblikovanje mora biti kvalitetno, u skladu sa ambijentom i ne smije estetski narušavati okolinu.
 - Štandovi za prodaju lutrija, srećki, karata, polovnih knjiga i slične literature je tipiziran, lako prenosivi element, predviđen za prodaju navedenih proizvoda, prezentiranje proizvoda i usluga.
 - Info stolovi su pokretni elementi za podjelu promotivnog materijala, prikupljanje potpisa i skupljanje novčane pomoći u humanitarne svrhe.
 - Jarbol je montažno-demontažni element koji omogućava postavljanje zastave promotivnog ili reklamnog karaktera, postavljen u skladu sa ambijentom, prikladnog estetskog sadržaja.
 - Zabavni park je prostorno definirana cjelina čija tlocrtna organizacija, odnosno zauzeće javne površine ovisi o broju i vrsti naprava za zabavu.
 - Reklamni balon se postavlja u svrhu promocije događaja, usluga i proizvoda.
 - Punionica za električna vozila je prostorno neovisna prostorna jedinica koja se postavlja uz odobrena parking mjesta, na kojoj se vrši punjenje vozila električnom energijom.
 - Parkomat je prostorno neovisna prostorna jedinica na kojem se vrši uplata parking karte.
 - Reciklomat je prostorno neovisna prostorna jedinica u koji se odlaže posebna vrsta ambalaže.
 - Ostali specifični sadržaji.
- (2) Manifestacijom se smatra svako događanje u kraćem vremenskom razdoblju povodom kulturnih, zabavnih, sportskih, humanitarnih, drugih dešavanja i slično, koje može biti popraćeno ugostiteljskom i trgovačkom djelatnošću.
- (3) Odlaganje građevinskog materijala podrazumijeva utovar, istovar i odlaganje građevinskog materijala i opreme, za izvođenje radova na osnovu pravosnažnog odobrenja za građenje, odnosno izvođenje drugih radova. Izvođač radova je dužan da odloženi građevinski materijal zaštiti od rasturanja odgovarajućom ogradom.
- (4) Građevinska fasadna skela je konstrukcija za izvođenje radova na visini, propisno označene i osigurane u skladu sa tehničkim propisima, normativima, te važećim pozitivnim propisima.

- (5) Parking prostor na javnoj površini je prostor predviđen za parkiranje vozila zajedno sa komunikacijskom saobraćajnicom i opremom neophodnom za funkcionisanje parkinga, propisno označen u skladu sa saobraćajnim propisima.

Član 4.
(Ostali sadržaji)

- (1) Odobrenje za privremeno korištenje javne površine, izuzetno, Općinski načelnik može izdati za postavljanje i drugih sadržaja i uređaja koji nisu navedeni u ovoj Odluci.
- (2) Odobrenje za privremeno korištenje javne površine neće se izdavati za postavljanje urbanog mobilijara na javnoj površini kao što su: klupe za sjedenje, korpe za otpatke, nadstrešnice u okviru autobuskih, tramvajskih, trolejbuskih i kombibuskih stajališta.

Član 5.
(Neizgrađeno građevinsko zemljište)

Neizgrađenim građevinskim zemljištem smatra se zemljište unutar granica Općine, koje je u zemljišnoj knjizi ili/i u katastru nekretnina upisano kao državna svojina, odnosno na kojem Općina ima pravo korištenja, upravljanja, raspolaganja ili vlasništvo, a koje nije privedeno trajnoj namjeni.

II - USLOVI I KRITERIJI ZA PRIVREMENO KORIŠTENJE JAVNIH POVRŠINA

Član 6.
(Potrebna dokumentacija)

- (1) Podnosilac zahtjeva za privremeno korištenje javne površine dužan je da, uz zahtjev, dostavi sljedeće:
 - odobrenje za obavljanje određene djelatnosti, (ukoliko je odobrenje starije od jedne godine i uvjerenje o kontinuiranom obavljanju djelatnosti),
 - rješenje o upisu subjekta u sudski registar ili aktuelni izvod iz sudskog registra (ne starije od 2 mjeseca),
 - rješenje o ispunjavanju minimalnih tehničkih uslova (za novootvorene ugostiteljske objekte/radnje),
 - saglasnost o namjeni,
 - uvjerenje o poreznoj registraciji,
 - kopiju katastarskog plana i
 - idejno rješenje sa ucrtanom površinom.

- (2) Podnosilac zahtjeva je obavezan, za privremeno korištenje javnih površina u svrhu postavljanja slobodnostojećih otvorenih bašti, slobodnostojećih displeja, slobodnostojećih reklamnih panoa, kioska, telefonskih govornica, uz dokumente iz stava (1) ovog člana, dostaviti i urbanističku saglasnost, a za javni parking prostor rješenje o odobravanju javnih površina kao javnog parking prostora, sve izdato od strane nadležne Službe za urbanizam.

Član 7.

(Plan privremenog korištenja javnih površina)

- (1) Sadržaji i lokacije definisani su Planom privremenog korištenja javnih površina, koji utvrđuje nadležna služba, te donosi Općinsko vijeće uz saglasnost Ministarstva saobraćaja Kantona Sarajevo.
- (2) Lokacije koje nisu obuhvaćene Planom iz stava 1. odobravaju se u skladu sa odredbama Zakona i prostornim mogućnostima.

Član 8.

(Pokretne tezge povodom značajnih datuma)

- (1) Zahtjevi za postavljanje prodajnih stolova (pokretne tezge) povodom značajnih historijskih, vjerskih i drugih datuma podnose se najranije 30 dana prije nastupanja značajnih historijskih, vjerskih i drugih datuma, a najkasnije 10 dana prije nastupanja tih datuma.
- (2) Period privremenog korištenja javnih površina za postavljanje prodajnih stolova iz prethodnog stava utvrđuje se u trajanju do 7 dana.
- (3) Zahtjev za postavljanje info stolova za podjelu promotivnog materijala i skupljanje novčane pomoći u humanitarne svrhe može se podnijeti jednom u 60 dana od strane istog korisnika javne površine.
- (4) Info sto za skupljanje novčane pomoći u humanitarne svrhe može se odobriti u maksimalnom periodu od 5 dana.

Član 9.

(Period korištenja javnih površina za postavljanje stolova ispred ugostiteljskih radnji i slobodnostojećih ljetnih bašti)

- (1) Period privremenog korištenja javnih površina za postavljanje stolova ispred ugostiteljskih radnji i slobodnostojećih ljetnih bašti utvrđuje se u periodu od 15. aprila do 15. oktobra tekuće godine za ljetni period i od 16. oktobra do 14. aprila naredne godine, za zimski period.
- (2) Korisnicima javne površine iz stava 1. odobrenje za korištenje javne površine može se izdati samo za naprijed navedene periode neprekidno, izuzev onih korisnika kojima će se odobrenje za korištenje javne površine izdati prvi put u tekućoj godini po sticanju pravnog osnova za korištenje poslovnog prostora, izdavanja odobrenja za obavljanje djelatnosti, odnosno utvrđivanja minimalnih tehničkih uslova za obavljanje djelatnosti.

Član 10.
(Dodjela lokacija)

Dodjela lokacija za privremeno korištenje javnih površina za postavljanje kioska, slobodnostojećih ljetnih bašti, slobodnostojećih reklamnih panoa i slobodnostojećih displeja u obuhvatu elaborata, vrši se putem javnog oglasa, na način utvrđen ovom Odlukom.

Član 11.
(Javni oglas)

- (1) Javni oglas za dodjelu lokacija za sadržaje navedene u članu 10. ove odluke objavljuje se najmanje u jednom od dnevnih listova na području Federacije Bosne i Hercegovine i web stranici Općine.
- (2) Sadržaj javnog oglasa utvrđuje Općinski načelnik na prijedlog nadležne Službe za komunalne poslove, u skladu sa Zakonom i ovom Odlukom, sa naznakom namjene korištenja lokacije, a u skladu sa važećim Elaboratom.
- (3) Pravo učešća na oglasu za dodjelu lokacija za privremeno korištenje javnih površina iz člana 10. ove Odluke, imaju pravna lica registrovana za obavljanje određene djelatnosti i fizička lica koja imaju odobrenje za obavljanje djelatnosti (korisnici).
- (4) Općinski načelnik može do 50% lokacija dodijeliti putem posebnog javnog oglasa, po kriterijima i mjerilima iz člana 14. ove Odluke, fizičkim licima i osnivačima pravnih lica koji time rješavaju pitanje svog zaposlenja, i to:
 - članovima uže porodice šehida i poginulih boraca;
 - ratnim vojnim invalidima odbrambenog rata;
 - demobilisanim borcima.
- (5) Licima iz prethodnog stava smatraju se lica utvrđena važećim pozitivnim zakonskim propisima o pravima boraca - branitelja Bosne i Hercegovine.

Član 12.
(Postupak dodjele lokacija)

- (1) Postupak dodjele lokacija provodi komisija koju rješenjem imenuje Općinski načelnik.
- (2) Komisija iz stave (1) ovog člana se sastoji od pet članova, i to 4 člana iz reda državnih službenika, a jedan član iz reda vijećnika općinskog vijeća Stari Grad Sarajevo.
- (3) Komisija ima zadatak da:
 - priprema javni oglas za dodjelu lokacija u saradnji sa nadležnom Službom za komunalne poslove;
 - razmatra dodjelu lokacija po osnovu prava prvenstva;

- utvrđuje prijedlog liste o dodjeli lokacija i isti dostavlja Općinskom načelniku;
- Odluku o odabiru korisnika dostavlja nadležnoj službi za poslove urbanizma radi izdavanja urbanističke saglasnosti i odobrenja za građenje za radove postavljanja sadržaja iz člana 10. ove Odluke, po podnesenom zahtjevu od strane odabranih korisnika.

Član 13. (Najpovoljnija ponuda)

- (1) Najpovoljnija ponuda po javnom oglasu iz člana 11. ove odluke je ponuda koja sadrži najveći ponuđeni iznos naknade za korištenje javne površine.
- (2) Ako su dvije ili više ponuda fizičkih lica jednake i utvrđene kao najpovoljnije, prednost ima ponuda nezaposlenog lica, odnosno lica koje ima veći broj nezaposlenih članova uže porodice.
- (3) Ako su dvije ili više ponuda pravnih lica jednake i utvrđene kao najpovoljnije, prednost ima ponuda pravnog lica sa većim brojem uposlenih radnika.
- (4) U slučaju da su dvije ili više ponuda pravnih i fizičkih lica jednake i utvrđene kao najpovoljnije, prednost ima ponuda pravnog ili fizičkog lica koje je već koristilo javnu površinu u navedenu svrhu. Ukoliko ni pravno ni fizičko lice nije koristilo javnu površinu, prednost ima lice za koje to ocjeni Komisija, uz detaljno obrazloženje.

Član 14. (Prvenstveno pravo za dodjelu lokacija)

- (1) Prvenstveno pravo za dodjelu lokacija iz člana 11. stav 4. Odluke, utvrđuje se na osnovu slijedećih kriterija:
 - 1) visina naknade, za svaku KM iznad početnog iznosa naknade 5 bodova
 - 2) član šehidske porodice i porodice poginulog borca - branitelja 100 bodova
 - 3) invalidnost podnosioca ponude - ratnog vojnog invalida:
 - tjelesno oštećenje 100% 100 bodova
 - tjelesno oštećenje 20-90%, za svaki stepen tjelesnog 1 bod oštećenja
 - 4) vojna priznanja:
 - Zlatni ljiljan i Zlatna policijska značka 80 bodova
 - ostala vojna priznanja utvrđena važećim pozitivnim zakonskim propisima o pravima boraca - branitelja Bosne i Hercegovine 50 bodova
 - 5) Učešće u OS RBiH:
 - za svaku punu godinu učešća 15 bodova

- organizator otpora 10 bodova

- veteran 8 bodova

6) članovi uže porodice podnosioca ponude: - za svakog člana 5 bodova

Za svakog nezaposlenog člana broj bodova iz ove tačke uvećava se za 5 bodova.

7) Ponuđač sa prebivalištem, odnosno sjedištem na području Općine Stari Grad Sarajevo, u kontinuitetu najmanje 2 godine 30 bodova

(2) Pod članom uže porodice, u smislu ove Odluke, smatraju se: bračni drug, roditelji i djeca koji žive u zajedničkom domaćinstvu sa podnosiocem ponude.

Član 15.

(Prednost pri odabiru najpovoljnije ponude)

Najpovoljnija ponuda iz člana 14. odluke je ponuda sa najvećim brojem bodova. U slučaju da više ponuđača ima jednak broj bodova, prednost ima ponuda prema sljedećem redoslijedu:

- sa najdužim učešćem u OS Armije RBiH;

- sa najvećim iznosom ponuđene naknade;

- sa najvećim brojem nezaposlenih članova porodičnog domaćinstva.

Član 16.

(Dodjela lokacija izvan obuhvata elaborata)

(1) Dodjelu lokacija za privremeno korištenje javnih površina za postavljanje kioska i slobodnostojećih ljetnih bašti, izvan obuhvata elaborata, odobrava Općinski načelnik, putem nadležne službe, bez oglašavanja, prema prostornim mogućnostima i mišljenju Zavoda za planiranje razvoja Kantona Sarajevo.

(2) Naknada za privremeno korištenje javne površine iz prethodnog stava se utvrđuje prema zoni u kojoj se lokacija nalazi.

(3) Do usvajanja Elaborata, kao osnov za dodjelu javnih površina putem javnog poziva i neposredno koristit će se Plan korištenja javnih površina usvojen od strane Općinskog vijeća.

III - NAKNADA ZA KORIŠTENJE JAVNE POVRŠINE

Član 17.

(Naknada za postavljanje kioska u postupku oglašavanja)

- (1) Početna cijena za postavljanje kioska u obuhvatu elaborata, u postupku oglašavanja iznosi:
 - u ekstra zoni 80,00 KM
 - u centralnoj zoni 65,00 KM
 - u I zoni 40,00 KM
 - u II zoni 30,00 KM.
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.
- (3) Naknada za postavljanje kioska za koji je produženo odobrenje za građenje, u skladu sa odredbama Zakona o prostornom uređenju plaća se prema cijenam iz stave (1) ovog člana.

Član 18.

(Naknada za postavljanje slobodnostojećih ljetnih bašti)

- (1) Početna cijena za postavljanje slobodnostojećih ljetnih bašti, u obuhvatu elaborata, u postupku oglašavanja, iznosi:
 - u ekstra zoni 60,00 KM
 - u centralnoj zoni 40,00 KM
 - u I zoni 30,00 KM
 - u II zoni 20,00 KM
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.
- (3) Visina naknade za korištenje javne površine za namjenu iz stava (1) ovog člana, uvećava se za 10% od utvrđene naknade ukoliko su u istoj postavljeni suncobrani, odnosno tenda sa reklamnim sadržajem.
- (4) Naknada za postavljanje slobodnostojećih ljetnih bašti za koji je produženo odobrenje za građenje, u skladu sa odredbama Zakona o prostornom uređenju plaća se prema cijenam iz stave (1) ovog člana.

Član 19.

(Naknada za postavljanje slobodnostojećih reklamnih panoa i displeja)

- (1) Naknada za postavljanje slobodnostojećih reklamnih panoa, slobodnostojećih displeja, utvrđuje se po m² ortogonalne projekcije na javnu površinu i iznosi 50,00 KM mjesečno.
- (2) Ortogonalna projekcija u smislu ove Odluke je površina koju bi zauzeo slobodnostojeći reklamni pano ili slobodnostojeći displej kada bi se spustio na javnu površinu.
- (3) Naknada iz st. 1 ovog člana ne može biti manja od 50 KM mjesečno.
- (4) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 20.

(Naknada za postavljanje slobodnostojećih telefonskih govornica)

- (1) Naknada za postavljanje slobodnostojećih telefonskih govornica iznosi 50,00 KM/m², mjesečno.
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 21.

(Naknada za postavljanje prodajnih stolova ispred poslovnih prostora)

- (1) Naknada za postavljanje prodajnih stolova ispred poslovnih prostora za izlaganje i prodaju robe iznosi:
 - u ekstra zoni 50,00 KM
 - u centralnoj zoni 40,00 KM
 - u I zoni 30,00 KM
 - u II zoni 20,00 KM
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

- (3) Visina naknade za korištenje javne površine za namjenu iz stava (1) ovog člana, kao i za slobodnostojeće ljetne bašte odobrene putem javnog oglasa, u zimskom periodu, umanjuje se za 50%.
- (4) Visina naknade za korištenje javne površine za namjenu iz stava (1) ovog člana, uvećava se za 10% od utvrđene naknade ukoliko su postavljeni suncobrani, odnosno tenda sa reklamnim sadržajem.

Član 22.

(Naknada za postavljanje stolova ispred ugostiteljskih radnji)

- (1) Naknada za postavljanje stolova ispred ugostiteljskih radnji iznosi:
- u ekstra zoni 60,00 KM
 - u centralnoj zoni 40,00 KM
 - u I zoni 30,00 KM
 - u II zoni 20,00 KM.
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.
- (3) Visina naknade za korištenje javne površine za namjenu iz stava (1) ovog člana, kao i za slobodnostojeće ljetne bašte odobrene putem javnog oglasa, u zimskom periodu, umanjuje se za 50%.
- (4) Visina naknade za korištenje javne površine za namjenu iz stava (1) ovog člana, uvećava se za 10% od utvrđene naknade ukoliko su postavljeni suncobrani, odnosno tenda sa reklamnim sadržajem.

Član 23.

(Naknada za postavljanje rashladnih uređaja)

- (1) Naknada za postavljanje konzervatora - rashladnih uređaja za prodaju sladoleda i pića, uređaja za pečenje pečenjarskih i sličnih proizvoda, po m² korisne površine, iznosi mjesečno:
- u ekstra zoni 60,00 KM
 - u centralnoj zoni 40,00 KM
 - u I i II zoni 30,00 KM

- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 24.

(Naknada za postavljanje žardinjera i suncobrana)

- (1) Naknada za postavljanje žardinjera i suncobrana iznosi 30,00 KM mjesečno po jednoj žardinjeri, odnosno jednom suncobranu.
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 25.

(Naknada za postavljanje pokretnih reklamnih panoa)

- (1) Naknada za postavljanje pokretnih reklamnih panoa iznosi 50,00 KM mjesečno po jednom panou.
- (2) Maksimalna površina zauzimanja javne površine iznosi 1 m², a maksimalna visina je 1,5 m.
- (3) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 26.

(Naknada za postavljanje sanduka za čišćenje obuće)

- (1) Naknada za postavljanje sanduka za čišćenje obuće, vage za mjerenje tjelesne težine iznosi 20,00 KM mjesečno.
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 27.

(Naknada za postavljanje cirkuskih šatora)

- (1) Naknada za postavljanje cirkuskih šatora iznosi 250,00 KM po danu.
- (2) Utvrđena naknada plaća se unaprijed za odobreni period prilikom preuzimanja rješenja.

Član 28.

(Naknada za postavljanje klupa)

- (1) Naknada za postavljanje klupa za sjedenje po m², iznosi 15,00 KM mjesečno.

- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 29.

(Naknada za postavljanje zabavnih sadržaja)

- (1) Naknada za postavljanje zabavnih sadržaja za djecu do 2 m², iznosi mjesečno:
- u ekstra zoni 250,00 KM
 - u centralnoj zoni 200,00 KM
 - u I i II zoni 50,00 KM
- (2) Za zabavne sadržaje za djecu, koji zauzimaju javnu površinu više od 2 m², naknada za svaki naredni kvadratni metar obračunava se, dodatno, po 20,00 KM mjesečno.
- (3) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 30.

(Naknada za postavljanje tezgi za prodaju lutrija, srećki i ulaznica)

- (1) Naknada za postavljanje tezge za prodaju lutrija, srećki i ulaznica za razne manifestacije, te postavljanje sadržaja za promovisanje proizvoda poslovnih subjekata, po m² korisne površine, iznosi dnevno:
- u ekstra zoni 100,00 KM
 - u centralnoj zoni 80,00 KM
 - u I i II zoni 50,00 KM
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 31.

(Naknada za postavljanje slikarskog štafelaja)

- (1) Naknada za postavljanje slikarskog štafelaja (izložbeni slikarski panoi) za umjetnički rad na licu mjesta i prodaju umjetničkih slika, po dužnom metru, iznosi mjesečno:

- u ekstra zoni 50,00 KM
 - u centralnoj zoni 40,00 KM
 - u I i II zoni 30,00 KM
- (2) Naknada za postavljanje tezge za prodaju umjetničkih i drugih predmeta, proizvoda izrađenih ručnim radom, štampe i knjiga, po m², iznosi mjesečno:
- u ekstra zoni 50,00 KM
 - u centralnoj zoni 40,00 KM
 - u I i II zoni 30,00 KM
- (3) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 32.

(Naknada za postavljanje jednog vozila)

- (1) Naknada za postavljanje jednog vozila u svrhu izvlačenja nagrada, igara na sreću, te održavanje zabavnih, sportskih i drugih manifestacija, po danu, iznosi:
- u ekstra zoni 300,00 KM
 - u centralnoj zoni 250,00 KM
 - u I i II zoni 200,00 KM
- (2) Utvrđena naknada plaća se unaprijed za odobreni period prilikom preuzimanja rješenja.

Član 33.

(Naknada za postavljanje tezge)

- (1) Naknada za postavljanje jedne tezge za prodaju čestitki, polovnih knjiga i slične literature, cvijeća, jelki i prigodnih poklona, iznosi po danu:
- u ekstra zoni 80,00 KM
 - u centralnoj zoni 65,00 KM

- u I zoni 40,00 KM
 - u II zoni 30,00 KM.
- (2) Utvrđena naknada plaća se unaprijed za odobreni period prilikom preuzimanja rješenja.

Član 34.

(Naknada za postavljanje info stolova)

- (1) Naknada za postavljanje info stolova, po stolu, iznosi dnevno:
- u ekstra zoni 60,00 KM
 - u centralnoj zoni 40,00 KM
 - u I i II zoni 30,00 KM

Član 35.

(Naknada za ostale specifične sadržaje)

- (1) Naknada za ostale specifične sadržaje (umjetnici za izvođenje kulturnog i zabavnog programa, prodaja na ulici i sl.), iznosi mjesečno:
- u ekstra zoni 100,00 KM
 - u centralnoj zoni 80,00 KM
 - u I i II zoni 50,00 KM.
- (2) Utvrđena naknada plaća se unaprijed za odobreni period prilikom preuzimanja rješenja.

Član 36.

(Naknada za postavljanje čuvarske kućice)

- (1) Naknada za postavljanje čuvarske kućice iznosi 50,00 KM/m², mjesečno.
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 37.

(Naknada za postavljanje reklamnog balona)

- (1) Naknada za postavljanje reklamnog balona iznosi 100,00 KM, dnevno.
- (2) Utvrđena naknada plaća se unaprijed za odobreni period prilikom preuzimanja rješenja.

Član 38.

(Naknada za postavljanje jednog bicikla)

- (1) Naknada za postavljanje jednog bicikla mjesečno:
 - ekstra zona 200,00 KM
 - centralna zona 150,00 KM
 - u I zoni 100,00 KM
 - u II zoni 80,00 KM
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 39.

(Naknada za postavljanje jednog objekta jednostavnih usluga)

- (1) Naknada za postavljanje jednog objekta jednostavnih usluga u nepokretnom ili priključnom vozilu, s tim da pogodno mjesto bude uređeno, iznosi dnevno:
 - ekstra zona 50,00 KM
 - centralna zona 40,00 KM
 - I zona 30,00 KM
 - II zona 20,00 KM
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 40.

(Naknada za postavljanje objekta na kolicima)

- (1) Naknada za postavljanje jednog objekta jednostavnih usluga na kolicima, iznosi mjesečno:
 - ekstra zona 300,00 KM

- centralna zona 200,00 KM
 - I zona 100,00KM
 - II zona 75,00 KM
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 41.

(Naknada za postavljanje uslužne naprave)

- (1) Naknada za postavljanja uslužne naprave, s tim da pogodno mjesto bude uređeno, iznosi mjesečno:
- ekstra zona 250,00 KM
 - centralna zona 200,00 KM
 - I zona 150,00 KM
 - II zona 75,00 KM
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 42.

(Naknada za postavljanje specifičnog sadržaja)

- (1) Naknada za postavljanje jednog specifičnog sadržaja iznosi 50,00 KM po danu.
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 43.

(Naknada za postavljanje privremenih objekata za potrebe gradilišta)

- (1) Naknada za postavljanje privremenog objekta (kontejnera, skela i sl.) za potrebe gradilišta, iznosi 20,00 KM/m² mjesečno.
- (2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 44.

(Naknada za održavanje kulturnih, zabavnih, sportskih i komercijalnih manifestacija)

(1) Naknada za održavanje kulturnih, zabavnih, sportskih i komercijalnih manifestacija, te sajмова i festivala do 300,00 m² javne površine, iznosi dnevno:

- u ekstra zoni 300,00 KM
- u centralnoj zoni 200,00 KM
- u I i II zoni 100,00 KM

(2) Naknada za namjenu iz stava (1) ovog člana od 300 m² do 600 m² javne površine, iznosi dnevno:

- u ekstra zoni 500,00 KM
- u centralnoj zoni 300,00 KM
- I i II zoni 200,00 KM

(3) Naknada za namjenu iz stava (1) ovog člana preko 600 m² javne površine, iznosi dnevno:

- u ekstra zoni 800,00 KM
- u centralnoj zoni 600,00 KM
- I i II zoni 400,00 KM.

(4) Utvrđena naknada plaća se unaprijed za odobreni period prilikom preuzimanja rješenja.

Član 45.

(Naknada za postavljanje jarbola)

(1) Naknada za postavljanje jarbola, po jarbolu, iznosi:

- ekstra zona 100,00 KM
- centralna zona 80,00 KM
- I zona 60,00KM

- II zona 40,00 KM

(2) Utvrđena naknada plaća se unaprijed za odobreni period prilikom preuzimanja rješenja.

Član 46.

(Naknada za postavljanje antenskih stubova, baznih stanica, električnih punionica, parkomata i reciklomata)

(1) Naknada za postavljanje antenskih stubova i baznih stanica za GMS radio i TV signal, električnih punionica, parkomata i reciklomata po m² iznosi mjesečno:

- u ekstra i centralnoj zoni 200,00 KM
- u I i II zona 100,00 KM.

(2) Utvrđena naknada plaća se unaprijed mjesečno, za odobreni period, a prva rata prilikom preuzimanja rješenja.

Član 47.

(Naknada za javni parking prostor)

Naknada za javni parking prostor, kao i postupka dodjele istih regulisat će se posebnim propisom Općinskog vijeća Stari Grad Sarajevo, shodno relevantnim zakonskim i podzakonskim aktima.

Član 48.

(Način plaćanja naknade)

(1) Korisnik javne površine može se opredijeliti da plaća utvrđenu naknadu za korištenje javne površine unaprijed za cijeli odobreni period ili mjesečno.

(2) Ukoliko se opredijeli da plaća naknadu mjesečno, korisnik javne površine obavezan je da izvrši uplatu za jedan mjesec prilikom preuzimanja rješenja, a za ostale mjesece da priloži bankovnu garanciju ili bjanko mjenicu na iznos duga, a ukoliko ne može obezbijediti bankovnu garanciju ili bjanko mjenicu, onda mora priložiti dokaz o otvorenom trajnom nalogu na iznos duga kod banke.

- Bankovne garancije se odnose na pravna lica;
- Bjanko mjenice se odnose na fizička lica i nevladine organizacije i udruženja;

(3) Ako obveznik dospjelu naknadu za korištenje javne površine ne plati u propisanom roku naplata će se izvršiti prinudnim putem, u skladu sa važećim pozitivnim propisima.

(4) Ukoliko korisnik javne površine u ostavljenom roku od dostavljanja opomene za plaćanje naknade za korištenje javne površine ne plati dug, rješenje o odobrenju će se staviti van snage, a korisnik će biti u obavezi da vrati površinu u prvobitno stanje u roku od 8 dana od dana donošenja navedenog rješenja.

Član 49.
(Izuzeci od plaćanja naknade)

- (1) Naknada za korištenje javne površine neće se naplaćivati u slijedećim slučajevima:
- Za kulturne, zabavne i sportske manifestacije koje se priređuju u humanitarne svrhe i besplatno,
 - Za udruženja u svrhu prikupljanja potpisa i peticija, te postavljanje info stolova u humanitarne svrhe,
 - Za ostale aktivnosti koje su od interesa za lokalnu samoupravu,
 - za postavljanje stolova ispred ugostiteljskih objekata, zavisno od mogućnosti korištenja javne površine, najduže do 2 mjeseca, po prijedlogu korisnika, o čemu odlučuje Općinski načelnik, uz prethodnu saglasnost Općinskog vijeća.
- (2) Korisnik javne površine iz stava 1. ovog člana, dužan je na utvrđenu naknadu platiti PDV po fakturama dostavljenim od stane nadležne službe.

Član 50.
(Obračun naknade za korištenje javne površine)

- (1) Naknada za korištenje javne površine utvrđena posebnim rješenjem, obračunava se u bruto iznosu, koji uključuje neto iznos sa obračunatim iznosom PDV-a.
- (2) Prikupljena naknada u cijelosti pripada Općini Stari Grad Sarajevo.

Član 51.
(Postupak prijevremenog uklanjanja sadržaja)

- (3) Ukoliko korisnik javne površine istu ne koristi u odobrenom periodu, odnosno ukoliko mu prestane pravni osnov za korištenje poslovnog prostora ili odobrenje za obavljanje djelatnosti bude poništeno ili stavljeno van snage, dužan je odmah obavijestiti općinskog komunalnog inspektora, koji će sačiniti zapisnik na licu mjesta.
- (2) Korisnik je o razlozima za nekorištenje javne površine dužan obavijestiti komunalnog inspektora najkasnije u roku od 30 dana od dana izdavanja rješenja o odobrenju, odnosno najkasnije u roku od 7 dana od dana nastanka okolnosti iz stava 1. ovog člana.
- (4) Zapisnik mora sadržavati fotografije sa uviđaja, datum prestanka korištenja, te konstataciju inspektora da je javna površina dovedena u prvobitno stanje.
- (5) Uz zahtjev za izmjenu odobrenja u pogledu perioda korištenja i oslobađanje plaćanja naknade iz stava 1. ovog člana, korisnik javne površine je dužan da dostavi zapisnik iz stava 2. ovog člana.
- (6) Rješenje o izmjeni odobrenja u pogledu perioda korištenja javne površine i rješenja kojim je utvrđena naknada donosi nadležna Služba i isto se dostavlja korisniku javne površine, nadležnoj komunalnoj inspekciji i Službi za finansije.

Član 52.
(Dugovanja)

- (1) Korisnicima javne površine koji nisu u cijelosti izmirili naknadu za ranije odobreni period, ne može se ponovo izdati odobrenje za korištenje javne površine, a protiv istih bit će pokrenut postupak za prinudnu naplatu putem suda.
- (2) Za korisnike javnih površina iz stava 1. ovog člana, odobrenje za korištenje može se produžiti, odnosno izdati novo odobrenje za korištenje javne površine, ukoliko korisnik javne površine u roku od 15 dana od dana prijema rješenja izjavi žalbu i uz istu dostavi dokaz o plaćenju naknadi iz prethodnih godina.
- (3) Korisniku javne površine kojem je shodno članu 24. Zakona o privremenom korištenju javnih površina izrečen gubitak prava korištenja javne površine u narednih pet godina, ne može se izdati novo rješenje za bilo koji oblik korištenja javne površine do isteka perioda od pet godina od dana donošenja rješenja o gubitku prava. Izrečena mjera gubitka prava odnosi se i na članove obitelji korisnika kojem je izrečen gubitak prava ako se radi o fizičkom licu, odnosno pravnim licima u kojima je korisnik ili njegov član obitelji osnivač ili je ovlašteno lice.
- (4) Korisnicima javne površine koji istu koriste za postavljanje kioska i slobodnostojeće ljetne bašte, a koji redovno izvršavaju obaveze utvrđene Zakonom o privremenom korištenju javnih površina na području Kantona Sarajevo, ovom Odlukom, rješenjem o privremenom korištenju javne površine i rješenjem o utvrđivanju visine naknade, korištenje javne površine, može se produžiti za svaku narednu godinu, bez raspisivanja oglasa.

Član 53.
(Evidencija korisnika)

Nadležne službe su u obavezi voditi evidenciju korisnika o izdatim odobrenjima za korištenje javne površine i korisnika koji postupaju suprotno odredbama prethodnog člana za tekuću godinu u koju se unose podaci: ime/naziv korisnika, adresa, lokacija, broj i datum rješenja, period korištenja, vrsta objekta, površina, poslovna zona i iznos naknade.

Član 54.
(Zone)

- (1) Javne površine na području Općine podijeljene su na: ekstra zonu, centralni dio, I, II i III zonu.
- (2) Ekstra zona u smislu ove Odluke, obuhvata: Trg Oslobođenja-Alija Izetbegović, Trg fra Grge Matića, Ferhadija, Sarači.
- (3) Centralni dio Općine, u smislu ove Odluke, obuhvata: Bašćaršija, Bašćaršijski trg, Bravadžiluk, Bravadžiluk mali, Ćumurija, Dženetića čikma, Gazihusrevbegova, Gajev trg, Hadžiristića, Jankovića čikma, Kundurdžiluk, Kvadrant XI, Mula Mustafe Bašeskije od ulice Niže banje do ulice Koturova, Mula Mustafe Bašeskije od ulice

Besarina čikma do ulice Telali, Trgovke, Velika avlija, Štrosmajerova, Vladislava Skarlića.

- (4) I. zona, u smislu ove Odluke, obuhvata ulice: Abadžiluk, Aščiluk, Austrisjki trg, Alifakovac do raskršća sa ulicom Veliki Alifakovac, Bazardžani, Bistrik od ulice Bakarevića, Brodac, Čizmeđiluk, Čulhan, Čurčiluk mali, Čurčiluk veliki, Despićeva, Đulagina, Halači, Hamdije Kreševljakovića, Jelića, Josipa Šadlera, Kazandžiluk, Kazazi, Konak, Kovači, Kovači čikma, Kračule, Kujundžiluk, Luledžina, Logavina do raskršća sa ulicom Toromanova, Mudželeti mali, Mudželeti veliki, Mustaj pašin Mejdan, Obala Isa bega Ishakovića, Isa bega Ishakovića (obala između mosta 'Ćumurija' i 'Latincka ćuprije '), Obala Kulina bana, Oprkanj, Patke, Pehlivanuša do ulice Petrakijine, Petrakijina, Prote Bakovića, Safvet bega Bašagića do raskršća sa ulicom Ulomljenica, Sagrdžije do raskršća sa ulicom Čemerlina, Saliha Hadžihuseinovića Muvekita, Zelenih beretki, Sime Milutinovića Sarajlije, Šeher Čehajina čikma, Tabaci, Telali.
- (5) II. zona, u smislu ove Odluke, obuhvata ulice: Alajbegovića, Avdage Šahinagića, Bakarevića, Bentbaša, Besarina čikma, Bistrik iza ulice Bakarevića do obilaznice, Bijela čikma, Ekmića čikma, Franjevačka, Hadžidamjanova, Jaroslava Černija čikma, Kasima ef. Dobrač, Koturova čikma, Logavina od raskršća sa ulicom Toromanova do kraja, Mula Mustafe Bašeskije od ulice Koturova do ulice Basarina čikma, Muse Čazima Čatića, Na Varoši, Saburina, Sagrdžije od raskršća sa ulicom Čemerlina do kraja, Safvet bega Bašagića od raskršća sa ulicom Ulomljenica do kraja, Todora Švrakića čikma.
- (6) III. zona obuhvata sve ostale ulice na području Općine koje nisu uvrštene u naprijed navedene zone

IV - NADZOR

Član 55. (Inspeksijski nadzor)

- (1) Poslove inspeksijskog nadzora nad provođenjem ove Odluke, vrši općinska inspekcija i to kako slijedi:
- poslove u oblasti urbanizma opisane u članu 25. stav 1., a u vezi sa članom 29. Zakona o privremenom korištenju javnih površina na području Kantona Sarajevo ("Službene novine Kantona Sarajevo", br. 20/04, 26/12, 32/12 i 24/15), općinska urbanističko- građevinska inspekcija,

- poslove u oblasti komunalnih djelatnosti opisane u članu 25. stav 2., a u vezi sa članom 29. Zakona o privremenom korištenju javnih površina na području Kantona Sarajevo ("Službene novine Kantona Sarajevo", br. 20/04, 26/12, 32/12 i 24/15), općinski komunalni inspektor.

(2) U provođenju nadzora općinski komunalni inspektor ovlašten je:

- narediti fizičkim i pravnim osobama radnje, ako pregledom utvrdi da se one ne obavljaju ili se obavljaju suprotno odredbama ove odluke i Zakona;

- naložiti uklanjanje privremenog objekta/sadržaja postavljenog bez odobrenja nadležne službe;

- poduzeti radnje za pokretanje prekršajnog postupka i izdavati prekršajne naloge;

- pregledati da li su ispunjeni uvjeti u skladu sa izdanim rješenjima;

- poduzimati i druge radnje i mjere za koje je ovlašten, u skladu sa Zakonom o privremenom korištenju javnih površina na području Kantona Sarajevo, Zakonom o komunalnim djelatnostima i ovom Odlukom.

V- KAZNENE ODREDBE

Član 56.

(Kaznene odredbe)

(1) Novčanom kaznom od 5.000 do 10.000 KM kaznit će se za prekršaj pravno lice ili imalac radnje:

- ako privremeno koristi javnu površinu suprotno odredbi člana 5. Zakona o privremenom korištenju javnih površina na području Kantona Sarajevo ("Službene novine Kantona Sarajevo", br. 20/04, 26/12, 32/12 i 24/15);

- ako, kao izvođač radova, privremeno zauzetu javnu površinu ne ogradi i ne označi propisanim znacima, ometa odvijanje saobraćaja, ošteti zgrade, ulice i trotoare, kao i ako građevinski materijal ne složi, uredno ne drži i ne obezbijedi normalno oticanje oborinskih voda (član 23. st. 4. i 5. Zakona o privremenom korištenju javnih površina na području Kantona Sarajevo);

- ako korisnici javnih površina iste ne održavaju u urednom stanju, a po isteku roka iz odobrenja, javnu površinu ne dovedu u prvobitno stanje i ako u slučaju potrebe ili kada nalaže javni interes ne uklone sadržaje postavljene na javnoj površini i prije isteka utvrđenog roka (član 24. st. 1. i 2. Zakona o privremenom korištenju javnih površina na području Kantona Sarajevo);

(2) Za prekršaje iz prethodnog stava kaznit će se i odgovorno lice u pravnom licu novčanom kaznom od 1.000 do 2.000 KM.

Član 57.

(Novčane kazne)

Novčanom kaznom od 500 do 1.000 KM kaznit će se za prekršaj fizičko lice:

- ako privremeno koristi javnu površinu suprotno odredbi člana 5. Zakona o privremenom korištenju javnih površina na području Kantona Sarajevo ("Službene novine Kantona Sarajevo", br. 20/04, 26/12, 32/12 i 24/15);

- ako, kao izvođač radova, privremeno zauzetu javnu površinu ne ogradi i ne označi propisanim znacima, ometa odvijanje saobraćaja, ošteti zgrade, ulice i trotoare, kao i ako građevinski materijal ne složi, uredno ne drži i ne obezbijedi normalno oticanje oborinskih voda (član 23. st. 4. i 5. Zakona o privremenom korištenju javnih površina na području Kantona Sarajevo);

- ako, kao korisnik javne površine, istu ne održava u urednom stanju, a po isteku roka iz odobrenja, javnu površinu ne dovede u prvobitno stanje i ako u slučaju potrebe ili kada nalaže javni interes ne ukloni sadržaje postavljene na javnoj površini i prije isteka utvrđenog roka (član 24. st. 1. i 2. Zakona o privremenom korištenju javnih površina na području Kantona Sarajevo)

Član 58.

(Novčane kazne)

Novčanom kaznom od 500 KM kaznit će se pravno lice ili imalac radnje a odgovorno lice i pojedinac od 100 KM, ako postupi suprotno odredbama člana 21. Zakona o privremenom korištenju javnih površina na području Kantona Sarajevo ("Službene novine Kantona Sarajeva", br. 20/04, 26/12, 32/12 i 24/15).

PRELAZNE I ZAVRŠNE ODREDBE

Član 59.

(Postupak po žalbi)

Protiv upravnih akata općinskog načelnika donesenih na osnovu ove Odluke u drugom stepenu rješava nadležni Drugostepeni organ za žalbe.

Član 60.

(Prestanak važenja propisa)

Početak primjene ove Odluke prestaje da važi Odluka o privremenom korištenju javnih površina na području Općine Stari Grad Sarajevo ("Službene novine Kantona Sarajeva", broj 41/13, 25/14 i 3/15).

Član 61.
(Započeti postupci)

Postupci započeti na osnovu propisa koji su bili na snazi do dana početka primjene ove Odluke okončat će se po odredbama tih propisa.

Član 62.
(Izdata rješenja)

Rješenja kojima je odobreno privremeno korištenje javne površine i rješenja kojima je utvrđena naknada za privremeno korištenje javne površine izdata do početka primjene ove Odluke, ostaju na snazi do isteka roka određenog u rješenju.

Član 63.
(Stupanje na snagu)

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

O B R A Z L O Ž E N J E

I – PRAVNI OSNOV

Pravni osnov za donošenje Odluke o korištenju javnih površina na području Općine Stari Grad Sarajevo sadržan je u odredbama propisa navedenih u preambuli ove Odluke.

Članom 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09), propisano je da je organ odlučivanja jedinice lokalne samouprave općinsko vijeće u općini, a gradsko vijeće u gradu.

Također, odredbom člana 27. Zakona o privremenom korišćenju javnih površina na području Kantona Sarajevo („Službene novine Kantona Sarajevo“, br. 20/04, 26/12,32/12 i 24/15) između ostalog propisano je da visinu naknade svih vidova privremenog korištenja javnih površina utvrđenih ovim zakonom, način naplate, usmjeravanje i mjere za sigurnu i efikasnu

naplatu utvrđuje svojim propisom općinsko vijeće, dok se za privremeno korišćenje javne površine za održavanje kulturnih, zabavnih, sportskih, humanitarnih i drugih manifestacija kao i drugih namjena od interesa za Grad, odobrenje donosi uz prethodno pribavljenu saglasnost nadležne gradske službe.

II – RAZLOZI DONOŠENJA ODLUKE

Uvažavajući da je važeća Odluka bila mijenjana, kao i da pojedine odredbe nisu detaljno razrađene, u cilju poboljšanja načina korištenja javnih površina, detaljnijeg regulisanja procedura, utvrđivanja naknade za korištenje javne površine, kao i prevazilaženja problema koji su uočeni u primjeni postojeće Odluke u praksi pripremljen je nacrt ove Odluke.

III – OBRAZLOŽENJE PREDLOŽENIH RJEŠENJA

Ovom Odlukom definišu se sljedeća pojedina rješenja:

I Poglavlje opće odredbe

Odredbom člana 1. i 2. utvrđen je predmet Odluke i nadležnost, odnosno pojam privremenog korištenja javne površine i oblasti koje se Odlukom obrađuju, a koje su od značaja za privremeno korištenje javnih površina, kao i organizaciona jedinica organa uprave nadležna za postupanje.

Odredbom člana 3. utvrđeni su sadržaji koji se mogu privremeno postaviti na javnim površinama, kao i značenje pojedinih pojmova.

Odredbom člana 4. i 5. utvrđeno je ko, izuzetno, daje odobrenje za ostale sadržaje koji nisu navedeni u Odluci, za koje sadržaje se neće izdavati odobrenje za privremeno korištenje javne površine, kao i šta se smatra neizgrađenim građevinskim zemljištem.

II Poglavlje uslovi i kriteriji za privremeno korištenje javnih površina

Odredbama članova 6. do 16. ove Odluke utvrđuje se potrebna dokumentacija za korištenje javne površine, plan privremenog korištenja javnih površina, pokretne tezge povodom značajnih datuma, period korištenja javnih površina za postavljanje stolova ispred ugostiteljskih radnji i slobodnostojećih ljetnih bašti, dodjela lokacija, javni oglas, postupak dodjele lokacija, najpovoljnija ponuda, prvenstveno pravo za dodjelu lokacija, prednost pri odabiru najpovoljnije ponude i dodjela lokacija izvan obuhvata elaborata.

III Poglavlje naknada za korištenje javne površine

Odredbama članova 17. do 51. ove Odluke utvrđena je visina naknade pojedinih vidova korištenja javnih površina, način plaćanja naknade, izuzeci od plaćanja naknade, lica koja ostvaruju pravo na umanjenje plaćanja naknade, te obračun naknade za korištenje javne površine.

Odredbama članova 52. do 54. ove Odluke definisan je postupak prijevremenog uklanjanja sadržaja sa javnih površina, dugovanja i evidencija korisnika javnih površina.

Odredbom člana 55. ove Odluke definisane su zone javnih površina na području Općine Stari Grad Sarajevo.

IV Poglavlje nadzor

Odredba člana 56. ove Odluke odnosi se na vršenje nadzora nad sprovođenjem ove Odluke.

V Poglavlje kaznene odredbe

Odredbama članova 57. do 58. utvrđene su kaznene odredbe.

Prelazne i završne odredbe

Odredbama članova 60. do 64. ove Odluke propisana je nadležnost postupanja po žalbi, način rješavanja započetih postupaka, rok trajanja izdatih rješenja do početka primjene ove Odluke, te stupanje na snagu, početak primjene i objave ove Odluke.

IV – FINANSIJSKA SREDSTVA

Za provođenje procedure usvajanja ove Odluke nisu potrebna finansijska sredstva, dok su za realizaciju iste potrebna finansijska sredstva koja su predviđena u Budžetu Općine Stari Grad Sarajevo.